

清初名儒年譜

陳祖武先生選
清人年譜系列

◎本社影印室

輯

◎北京圖書館出版社

陳祖武先生選
清人年譜系列

◎本社影印室 輯

◎北京圖書館出版社

清初名儒年譜

⑩

跋朱柏廬先生無欺錄後

玉峯東濱海隅山川靈秀爲吳群人文淵藪登巍科躋
膺仕者指不勝屈其以文學經術名世者如震川歸先
生亭林顧先生所著諸書固已風行海內矣獨柏廬朱
先生當鼎革之際因尊人集璜以貢生抗節歿義自比
於王裒之廬墓攀柏故號柏廬修身勵行不求聞達其
學問之精粹猶未大顯於世蓋

國初講學諸家北平則孫夏峰關中則李二曲淞東則
黃南雷當世稱爲三大儒然其學皆不免參以陸王其

粹然一本於程朱者惟桐鄉張楊園平湖陸稼書大倉
陸桴亭三先生而柏廬先生與之同時閉戶潛修實踐
躬行紹明絕學今觀其愧訥集及學庸講義等書與張
陸諸公皆以程朱爲宗若合符節當姚江之燄熾盛徧
於天下而先生乃能卓然自立不少惑於異說斯亦孟
子所稱豪傑之士也桂林陳榕門相國輯五種遺規誤
以先生治家格言爲朱子金壇于鶴泉學士爲先生作
傳詳其行誼亦未詳其著述蓋亭林先生旣屢辭薦辟
而先生尤尙闇修其書雖嘗付梓獨爲學者所珍秘未

得展轉摹傳如歸顧兩家彰彰在人耳目也往者予在
應敏齋方伯幕府方伯既請以楊園桴亭兩先生從祀
孔廟疆吏入告均奉

俞旨又從玉峰假得柏廬先生愧訥集及未刻稿擬重
刊以廣其傳會方伯謝事未果先生所著學庸講義今
官書局已重刻行無欺錄亦嘗以聚珍板印於吳門及
吾友金君臚青出宰玉峰次第訪得歸顧兩先生年譜
付之手民獨朱先生年譜徧求未獲近乃得其無欺錄
鈔本視吳門本尤爲詳備纂言紀事皆繫以年卽以爲

先生年譜也可爰謀彙刻以合成璧後之覽者由是以
窺先生之學之精粹庶可快然無憾而金君表彰前賢
之苦心亦與是編並垂不朽也已

光緒六年太歲上章執徐季夏之月瀨江周榮植謹跋

自講學之風起而分門闢戶其言傳者其人未必傳卽有儒行克敵而語皆凡近不足以開來學則人傳而言亦不足傳鹿城朱柏廬先生古今傳人也其所著治家格言已風行海內家絃戶誦惟毋欺錄一書一見於虞山顧氏所刻小石山房叢書略而弗詳一見於吳門擺板所印葉涵溪徵君舊藏潘晚香先生手鈔本始乙丑終丁丑雖見一斑未窺全豹瀾莅斯邑欲羅歸顧朱三先生之遺書而不可得適王子蘭廣文贈有震川先生年譜吳亦如茂才持有乃祖止狷先生所著亭林先生

年譜軍興後原板皆已無存亟付剞劂而終以未得柏
廬先生年譜不能爲三先生合刻也耿耿予懷宗伯垂
署正自安定來談次知王升卿茂才家藏有毋欺錄全
篇借錄一過倍於前刻各本自先生三十歲以迄七十
一歲按年紀錄纖屑不遺則先生之言行班班可考不
期傳而自傳千古矣且夫理學之興莫盛於宋而以紫
陽朱子爲集大成故其論誠意之功必以毋自欺爲本
先生後紫陽數百年上接淵源卓然有所統宗豈近日
所傳理學者可同日語哉濶得是編如獲異寶爰仿編

年之例重加纂輯其事實可稽及著述有攷者分年繫錄仍於毋欺錄之中寓年譜之義庶先生之學問行事相輔以傳且與歸顧兩先生年譜並垂不朽也夫先生爲節孝後人聽義訓迪前光故銘座右有曰受人言毋自欺誠意之功詎不足上繼紫陽耶吾願學者奉爲今日之紫陽可矣

光緒六年季夏之月嘉興金吳瀾公安氏謹序

永辭六平至夏之月燕興金吳關公安刀驚平
日之樂也百矣

自棋歸意之也至不以上繼眾國即吾願學若奉獻今
欲消幸於人羅幾隨此而次如說至古自曰受人言我
財神以得且與諸國兩夫士平並進不殊出夫次也
世世好棋終之中寓平情之遠如次士之學問其基
平之國重以纂輯其事何謂人皆服其教者乎

朱柏廬先生小象

吳麗胡錫珪敬摹



偉哉夫子荷道厥躬學純德茂克紹前縱
瀛洛闢閩淵源貫通義易語孟闡發性宗
蓼莪矢志攀柏高風惟忠惟孝土室身終
疾革吟誦心追放翁廷章候疾侍側夫子
朗吟劍南示子詩白
先生遺像氣粹貌充其中浩浩孰測化工
憫予小子則效靡從肅然瞻仰鄙悵潛融
偉哉夫子百世欽崇門人呂廷章百拜題

光緒己卯初秋古由拳孫福康敬書

朱柏廬先生傳

蘇州府志

朱用純字致一號柏廬崑山人集璜子年十七補郡諸生越二載遭國變痛父殉難棄去諸生冠服隱居教授以養母潛心四子六經及濂洛關閩之書探索融會務在躬行實踐當路重其人將以博學宏詞薦用純以死自誓作朱布衣傳以見志門弟子來學者先授以小學近思錄舉業外別立講約闡發經史晚年作輟講語示人曰中庸成已成物罔弗由誠然所謂誠者不外乎倫常日用之間今人心中不脫卑鄙二字倫理上只辨得

苟且二字以此讀書豈可語於聖賢之學雖日事講貫
奚益哉其箴砭後進嚴切如此生平嚴以律躬不欺暗
室每日晨興必謁家祠莊誦孝經一遍病革命設先像
扶起再拜以平日所著刪補蔡虛齋易經蒙引及四書
講義二書屬其子曰謹藏諸笥吾將以此見先人於地
下復語門弟子曰學問在性命事業在忠孝言訖而逝
年七十二門人私謚孝定先生

朱柏廬先生傳

震伯楊无咎撰

柏廬先生姓朱氏名用純字致一因厥考節孝先生之死於忠也創巨痛深等王裒之攀柏故自號曰柏廬是其德爲大孝學爲醇儒其歿也門人思之請於其同志之友楊无咎亦旣謚爲孝定先生矣茲爲傳其行事不以謚而仍以號稱者重君之志所存也朱氏之先自亳州徙睢陽者唐孝友先生名仁軌在宋避靖康之亂以六歲童子附柁渡江遂爲吳郡崑山始遷之祖者秘閣公名子榮也公九世孫希周謚恭靖爲明名臣官至宮

保南冢宰弟希曾仕江右甯州判官是爲君之高祖生
唐府審理公景昇景昇生家佐家佐生集璜卽節孝先
生也先生夙抱明德兼經濟才未仕於朝以貢士家居
殉國難詳門人徐孝廉枋所作傳中有四子君其長也
嗜學篤行才德酷類其父崇禎癸未年十七補博士弟
子員甫二載而遵節孝公之變君晝夜慟哭痛不欲生
時其弟用白用皞俱幼用商遺腹未生君以子身肩重
任義不敢以從死上奉母陶孺人下撫弟妹播遷流離
備極艱苦迨兵戈既定始得返其舊廬而家徒壁立卒

能善事慈闈先意承志以得其心迄其終二十年未嘗
一日貽之憂也教養諸弟俱不失爲賢者經營窶窶之
事以至婚嫁交際之屬亦罔弗旣厥心力此雖家庭之
庸行而設身處地求如柏廬之俯仰無憾者世亦鮮矣
君方弱歲卽棄諸生隱居教授潛心聖賢之學探索書
義罔弗驗之身心而見諸躬行故正己接物靡不歸於
至善而合乎中庸非徒以高節宏才爲人所敬仰也尤
循循善誘遊其門者隨其性之所近而各有獲焉先是
邦人重君之德爭設席以延君其後度不能以徧應也